

Cartoons denter iseglia, cruschs e carpiens

Il caricaturist Hans Moser muossa ina retrospectiva el Museum local Laax

■ (abc) En Svizra eis el in dils pli enconuscents caricaturists. Sia figura principala, il «Herr Schüüch», ei cumparada onns ora ella gasetta satirica «Nebelspalter». Dapi 38 onns habitescha Hans Moser a Laax. El Museum local da siu liug da domicil ha giu liug margis sera la vernissascha d'ina retrospectiva da ses cartoons e sias caricaturas. «Jeu spe-rel che vus seigies vegni cheu en quellas localitads per mirar mias caricaturas, e buca per mirar sch'jeu seigi madiers pil museum», ha la persuna principala manegiau a caschun dalla vernissascha. Igl ei in beinenconuscent habitont da Laax. Vid las preits alvas el tract da colligiazun dil museum local Laax pendan ina retscha da ses desegns humoristics. L'exposiziun da Hans Moser porta il tetel «Wo Berge sich erheben». El museum san ins contemplar ina retrospectiva dallas ovras ch'il caricaturist ha fatg dapi 1960.

Profils da baghegiar sco sujets


Dapi 1963 habitescha Hans Moser (79) a Laax. El po esser la persuna che ha observau il pli minuzius il svilup turistic ell'Arena dallas Alps. Cun tuscha, plema gitta e colurs ha el fatg sias notizias tier tschiens actualitads ed eveniments capitai el decurs da sia dimora a Laax.

Denter las differentas caricaturas che pendan vid la preit catt'ins enquala ch'ins ha viu zacu e che han gia lu leventau surrirs. Duront il boom da baghegiar a Laax ha Hans Moser du-



Il boom turistic dils onns siatonta ed otgonta han animau Hans Moser pil frontispezi dil «Nebelspalter» dils 19 da fevrer 1980: Il pionier Walter Gurtner cun pipa sil podest.

FOTO A. BEEU



Illustraziun ord in dils cudischs che la casa editura Nebelspalter ha publicau da Hans Moser. Il caricaturist muossa sesez cun ses «instruments» marcants da lavor: plema e marti, plievigia e sulegl.

vrau tscheu e leu ils profils da baghegiar sco sujet. Ina caricatura che penda el museum muossa in um cun barbis marcant e capiala isada da purs. Ord il sac da sias caultschas crodan banc-

notas. Igl um ei denton pigliaus. El ei serraus en dils profils ch'cin entuorn el.

Era la caricatura dil skiunz che va culla sutgera tras il clutger dalla basel-

gia da Laax han ins caschun dad ammirar. Ni quella cul pirat che smanatscha culla pistola giud la petga dalla pendiculara ils passaschiers dalla pendiculara. Quei ch'in fotograf ni in schurna-

list sa buca far, sa in caricaturist far. Ils desegns humoristics da Hans Moser cumprovan il dun digl observader discret che setegn buca anavos cun fina critica el mument actual. El ei denton buca quel che ha vuliu frenar il svilup turistic. El ha sulettamein commentau ils eveniments cun satira e dau anim a ponderaziuns.

Walter Gurtner el Nebelspalter

La retrospectiva el museum local da Laax muossa documents historicis dil turissem ell'Arena dallas Alps. Igl ei documents moderns, mintgin tucca la nota, mintgin sveglia in surrir.

Bias onns ha Hans Moser luvrau per la revista da satira «Nebelspalter». Sper sia figura principala «Herr Schüüch» ha el creau cun tuscha e strehs, en ner-alv ni colur, biasas autras caricaturas. Per exempel quella sil frontispezi dil «Nebelspalter» dils 19 da fevrer 1980. Gie, quei seigi propi Walter Gurtner, conferma il caricaturist. Il pionier dall'Arena dallas Alps san ins contemplar vid la preit el museum local a Laax. Hans Moser ei dil reminent buca madiers pil museum. Cun fin humor e satira ha el commentau. E cun slontsch commentescha el vinavon regularmein cun sia figura «Clochi» ils eveniments locals ell'Arena dallas Alps.

L'exposiziun speciala «Wo Berge sich erheben» el museum local Laax cuoz tochen ils 18 d'october. Ins sa mirar ella duront il temps d'avertura, mintgamai il margis e la gievigia, dallas 15.00 tochen las 18.00 ni tenor cuvegnienscha. Preannunzias per gruppas 920 81 81. Internet www.laax.ch/museum/